

光緒江西通志

江西通志卷一百三十三

宦績錄十五

南安府

宋

李夷庚字坦之隴西人初爲從事以勤著績漕運康侯表於朝擢南安軍丞至道中升爲守雪冤獄二百餘人

毀淫祠四十餘所

嘉靖林志始置南安軍

舊志原案宋淳化元年歐陽忞與地廣記云南

安軍自五代以前地理與虔州同凡南部都尉南康郡國均屬虔州故林志於南安名宦自宋李夷庚始

祝深字通甫三衢人至道中知南安軍事慈祥愷悌下教五曰修學化俗曰飭吏愛民曰清訟省困曰節用下士曰歲豐時和百姓宜之立祠於學

明一統志

嚴肅字成之大中祥符閒由大理丞知南安軍事有通敏之才正直之氣勸善懲惡民以無訟

南安府志

王式字用之曲江人年十四舉進士授祕書省校書郎
歷南安司理平居清謹自守至於發姦摘伏則一郡以

爲神明

南安府志

周敦頤字茂叔道州營道人元名敦實避英宗舊諱改
焉初爲分甯主簿有獄久不決敦頤至一訊立辨邑人
驚曰老吏不如也部使者薦之調南安軍司理參軍有
囚法不當死轉運使王達欲深治之眾莫敢爭敦頤獨
與之辨不聽乃委手版歸將棄官去曰殺人以媚人吾
不爲也達悟囚得免移郴之桂陽又徙知南昌南昌人
皆曰是能辨分甯獄者吾屬得所訴矣富家大姓黠吏
惡少惴惴焉不獨以得罪於令爲憂又以汙穢善政爲
恥厯合州判官部使者趙抃惑於譖口臨之甚威及通

判虔州朴方守虔熟視其所爲乃大悟執其手曰吾幾失君矣今而後乃知周茂叔也以疾求知南康軍因家廬山蓮花峯下前有溪合於溢江取營道所居濂溪以名之朴再鎮蜀將奏用之未及而卒年五十七嘉定十三年賜謚曰元公

宋史道學傳

陳升之字暘叔初名旭避裕陵諱以字行建州建陽人原作三衢人誤據宋史本傳改舉進士以校書郎知南康縣事爲政有體首建學校以勵俗化民熙甯中官至使相

嘉靖林志
南安府志

程敏叔熙甯閒以祕書丞出守南安軍始至訪問利病興廢以時既獲豐年迺因餘財以建學其後有曹登者紹聖閒爲南安太守以治郡顯聞所至亦好立學故南

安之學甲於江西

彭汝礪蘇軾
南安學記

郭見義字季勇河南人進士紹興間南安軍學教授立周程三先生祠於學撰記立石是爲表章周程道學之始

南安府志

都潔字聖與京口人紹興中知南安軍事勤身率下宣布德澤值年穀屢豐囹圄遂無繫者及移守南雄士民猶戀慕不已

嘉靖林志
南安府志

李聞之開封人紹興中知南安軍事寬嚴得中待士以禮復城東廟學之舊補書籍之遺郡人德之祠於學

南安府志

范振紹興中知南安軍事上書論雇役所苦者十事高宗嘉之謂其關民利病言多可采云

明一統志
南安府志

府志

黃謙字牧仲三山人進士乾道初知大庾縣事母老留
婦於家養母單車至官勤於政持守廉介吏民愛之嘗
攝南康既得代民老幼扶攜道送與大庾民語皆泣下

南安府志

黃由庚字道卿建甯人乾道中知南康縣事時猾吏與
姦民相表裏號難治由庚至正其詭弊皆凜然不敢欺

南安府志

管銳南陽人淳熙中知南安軍事勤政愛民增修學舍
民懷其德立祠於學曰頌福堂

南安府志

李大正字正之建安人淳熙中知南安軍事郡多豪猾
梗治賦稅常不集大正窮其源流洞中利害誅尤不奉
法者一郡肅然

嘉靖林志

方崧卿字季申莆田人淳熙閒擢知南安軍事廉勤平易嘗與教授許開修南安軍志

南安府志

戴翼字汝諧三山人紹定中原作紹興中誤攝南康縣事勇於興作嘗刲城壁再新縣治愈以有聞於時

嘉靖林志

胡泓紹定閒知上猶縣事築城以爲民障其後邑令李申巽卒藉是以禦元兵焉

嘉靖林志

梁現番禺人寶祐閒知南康縣事捐修文廟祭器課諸生舉行射禮遂爲都人士所懷

嘉靖林志

趙孟邁字菊山宗室子咸淳中一作熙知南安軍事以廉勤爲政以孝弟教民其於學校尤加意焉

歐陽守道南安學記

李申巽宋末知上猶縣事忠愛廉謹深得民心丙子冬元兵攻城申巽率居民死守元使來諭降申巽與民孽

梓發等誓曰邑未城以前遇變民輒散避今有城矣吾民當資以共守若前人建城後人以城降於義曷可乃堅守至七十五日城陷申巽死之路帥張伯子及梓發皆死時晴空不雲而雷讖者疑爲星隕云

嘉靖林志舊志原案安

志於南安名宦有宋一朝止載十人若張濟賢孫泗岳

飛程大昌趙希憲俱以統轄閩入其專治南安者僅守

令五人而已因從宋史明一統志

林志郡志及諸文集增補如右謹案舊志有程珦劉安世二傳俱無南安政績珦曾任興國有政聲改列贛州府安世則去之孤忠亮節久垂信史初不藉方志以傳也

元

張昉東平人至元中一作延祐中爲南安路總管始至卽訪閭閻疾苦奏罷不急之科作石隄以禦水患凡有利於民者爲之無遺民立祠祀之一統志

王虎英字雄甫歷陽人大德中爲南安路總管政教有聞尤盡心於學校改刱大成殿增飾學舍今規模制度皆其遺迹云

嘉靖
林志

趙明字明之大梁人至治間爲上猶令嘗禱雨雨至逐蝗蝗去驅厲厲息人以爲異時營前二倉輸糧屯軍之豪者阻之乃躬自部率豪帖服不敢動宿弊以除民爲立碑紀其績

南安
府志

汪澤民字叔志徽州婺源人徙居宣城延祐五年登進士第自同知平江州事轉承務郎遷南安路總管府推官鎮守萬戶多爾濟原作朵兒赤持官府短長其姪家郡吏王甲擅筆大庾縣令令訴諸郡同僚畏多爾濟勢託故不視事澤民獨捕甲繫之獄會監察御史行郡多爾濟

賂御史受甲家人訴欲出之召澤民於庭詰其獄狀聲色俱厲澤民徐曰王之姦賂人所知也御史欲屈法邪御史慙夜半馳馬去王卒伏罪居亡何多爾濟以贓敗部使者知其故檄澤民推獄杖罪之繼又正潮州判官錢珍獄宣撫使聞其名命巡南安章貢二郡事得專決聲績尤著擢承直郎信州路總管府推官丁內艱不赴後累官禮部尙書致仕卒謚文節元史本傳宋濂
汪文節公神道碑

毋秘爲南安路總管克修其官飭修廟學時稱賢守明

統志

謹案舊志有張元祚傳據南安府志元祚於洪武間尙爲南安知府今從府志改列明代

明

張元祚字德先大甯人元末任吉安總管改南安太祖

吳元年以城歸附洪武初詔仍爲南安知府在郡廉勤興學校修城池作陂渠建倉庫橋梁治麻下至犴獄皆所刪改以年老乞休遂家於郡

南安府志

于潤珪洪武初知南安府事當肇造之始宣威布澤綏懷安集城池廨宇學校橋梁之屬廢墜者修舉一新

嘉靖

林志

南

周以中字道和應天江甯人洪武初知南康縣事廉以律已信以示民先是民頗恃荒阻慢令惟以中能信服之凡有召役給片札無後期者

明一統志
南安府志

吳履字德基浙江蘭谿人李文忠鎮浙東聘爲郡學正久之舉於朝授南康丞南康俗悍謂丞儒也易之居數月摘發奸伏如老獄吏則皆大驚相率斂迹履乃改崇

寬大與民休息知縣周以中巡視田野爲部民所詈捕之不獲繫其鄉鄰履閼獄間故立釋之自以中曰犯公者一人耳其鄰何罪今繫者眾而捕未已急且有變奈何以中意解邑有淫祠每祀輒有蛇出戶民指爲神履縛巫責之沈神像於江淫祠遂絕明史循吏傳

高敏道安陽人永樂初以給事中左遷知上猶縣事悉心撫字賦役均平民皆樂業焉嘉靖林志

趙時中山東厯城人永樂閒任南安知府爲政廉勤勞於撫字鄰境皆聞其名明一統志

齊原銘湖廣湘潭人宣德閒知南康縣事廉介愛民以丁少賦重奏移繁役以蘇民困在任十二年既去民語及猶有涕泣者南安府志

林莘字從美浙江黃巖人舉人正統初知南安府事練達政務裁決如流而刑無濫及政暇從容詞翰卒於官

明一
統志

郭誠字貢實通州人正統中官南安守剛直勤敏百廢具興大庾有荒原高阜誠相度地勢開渠溉田至令民享其利

嘉靖
林志

許南傑字俊才浙江餘姚人宣德五年進士正統中任南安知府剛敏端恪妖賊孫佛羅等倡亂詔籍其黨民有被誣在籍中者悉白其冤

南安
府志

劉琮浙江金華人正統中爲南安通判多善政贍略過人石溪妖民孫志恭作亂琮親冒矢石一鼓平之民賴

以安

明一
統志

徐宗傑浙江金華人正統中任橫浦遞運所大使南源

山賊羅天師寇城宗傑率民兵拒之賊潰去

南安府志

汪惠達浙江常山人歲貢生正統中爲南安府經歷時
大庾縣有失額糧一千七百三十餘石民苦賠納惠達
力請豁除遂獲免

南安府志

雷任清湖廣桂陽人舉人景泰中任南安府教授盡心
施教諸生肄業學舍者漏下二十刻猶躬自叩門警之
使勿怠漏盡亦如之士之貧者贊幣束修皆不受

據南安府志

補

張弼字汝弼南直隸華亭人成化二年進士授兵部主
事進員外郎遷南安知府地當兩廣衝奸人聚山谷爲
惡悉捕滅之役重民疲力爲均節以時治橋梁道路毀

淫祠百數十所建爲社學且祀先哲之嘗蒞茲土者謝病歸士民爲立祠

明史文苑傳
一統志

夏璣字德乾南直隸崑山人景泰五年進士成化初知大庾縣事寬廉愛民持身清慎有古良吏風府學及道源書院皆其修葺祭器舊用陶璣始以青金易之調知新淦縣尋擢監察御史

明一統志
南安府志

毛智浙江仁和人舉人宏治中知南安府事廉慎有爲有權貴以貨殖越關射利智如法征之無所假借性廉介贈遺雖微不納重修布政分司署遷改大庾縣治皆竭力區措不以擾民入覲後辭官而去

嘉靖林志
南安府志
謹案

舊志作知南康據南安府志改正府志文義
未確者仍合舊志參訂使較然明白而已

鄧應仁字子榮廣東南海人宏治末知南安府事廉靜

平恕不事鞭朴在郡數年惟一童自隨門無私謁去後民思之有肖像祀於其家者

嘉靖志
林志

趙鶴字叔鳴南直隸江都人宏治九年進士歷郎中以忤劉瑾左遷南安同知時峒寇犯境鶴率兵迎敵寇掩至昇鶴至營鶴危坐曉以大義賊曰若盡如趙東衙吾輩豈至此乎翼送歸郡

安

虞鉉字剛夫浙江義烏人歲貢生正德間任上猶教諭時蠻賊負險士多廢學鉉善易親授生徒講習不倦以者乞休諸生追送至贛州猶不忍別其子文詡字廷曾舉人嘉靖中守南安亦有惠政人德之立碑以頌

南安府志

黃璋廣東順德人舉人正德十年知南康縣事廉介自持剛毅有執守立旌善懲惡二牌於要地善惡皆直書

其名眾服其公十一年峯賊謝志珊逼城七日璋率民
固守城賴以全未幾卒於官

嘉靖林志
南安府志

舒富湖廣夷陵人正德間授南康縣丞從王守仁征桶
岡橫水浰頭諸賊有功時崇義縣新立守仁奏富知縣
事招徠撫綏民皆晏然安堵守仁深倚賴焉

據南安
府志補

洪聰字謀甫福建晉江人正德末知南安府事南安地
僻民寡不及他郡上供之費與他郡略同聰在官力請
減損民甚德之俄以事罷去

南安
府志

鄭衷福建龍溪人嘉靖間知南康縣事清儉豈弟凡關
民生及學校之事咸誠心爲之立社學開便民門築學
前逆砂及填學後低陷之地植以竹木課試諸生親爲

講說改竄士風大振

南安
府志

谷同字用中南直隸南陵人嘉靖十五年知上猶縣事清介自持以培善抑強爲己任豪民捍法必嚴治之洪水衝決西城數十丈同捐贖錢修築未嘗費民一錢

上猶縣志

胡鑰字時準浙江崇德人嘉靖閒知上猶縣事才幹通

敏興利去弊學校縣治濱池街衢水道之屬皆盡力修治民不勞而事集以計典謫袁州府教授士論深惜焉

南安府志

吳鎬字宗周南直隸績溪人舉人嘉靖閒知上猶縣事實心爲政禮士愛民築城垣修學舍輯縣志置義田以備粢盛士赴選舉者解囊餽贍邑之重役若夫馬船價路費及修葺公廨皆加意減省載之碑以爲永利時有

劇盜據險積年爲患鎬設計誘撫密練鄉兵乘不意勦平之捷聞賜銀幣升安州知州士民爲立祠以祀

江南通志

府志 南安

余鐸字振之浙江黃巖人以貢授崇義訓導邑僻左士陋弗學鐸日與敦說詩書眾皆奮起故事齋膳夫直率倍徵鐸請於縣革之學旁多隙地募人藝蔬收其稅歸之官屢請歸不許會峽江尹成子學以御史檄行縣勢張甚鐸獨與抗禮成陰以沈涵中之坐免不知其不善杯杓也及歸諸生垂涕送之數百里外不能別據浙江通志補周鍾南直隸宿松人嘉靖二十六年進士三十九年知南安府事性彊毅兼善騎射廣東流寇至率家眾十數人邀擊之發一矢中掣旗者再發再中賊懼而走郡城

得全

南安府志

劉鑰字東皋四川宣撫司人歲貢生嘉靖閒任崇義縣事性清約里甲饋獻悉不受嘗曰邑小無大爭競何喋喋爲訟者至理論之往往而息

南安府志崇義縣志

支南安府志作文體義廣西全州人舉人嘉靖四十二年知大庾縣事先是流寇兩至邑體義請發公帑築水南新田鳳凰山九所等六城以爲保障民恃以安

安南

余世儒字汝爲南直隸婺源人隆慶二年知南康縣事條鞭法初行人情觀望世儒獨盡力行之除一切無名之征以爲嶺北諸邑倡

南安府志

林舜道字允中福建閩縣人嘉靖三十八年進士隆慶中任南安知府郡當江廣衝車騎絡繹舜道深知民間

疾苦一切供帳多所裁省自隨惟一篋儲冠裳及敝衣數襲而已秩滿升四川副使轉貴州廣西參政卒於官

福建通志

陳誥字巽甫福建莆田人嘉靖四十四年進士萬曆三十年知南安府事高潔方雅簡獄訟修學宮導誨諸生如子弟在任五年歲豐人和咸以爲德化之應升浙江按察副使晉參政舊志 南安府志

宋萬葉福建莆田人進士萬曆七年知南安府事方正詳慎政簡刑清葺書院修橋梁清郡中虛糧甦民積困民德之立祠以祀遷雲南按察司副使南安府志

吳江字元濯南直隸宿松人歲貢生萬曆七年任崇義縣事狗腳嶺者由縣至郡之路崎峻難行江修治之又

葺學宮及朝天關御史陳炌爲之記

舊志
義縣志
崇

劉宦成湖廣衡陽人舉人萬曆十年知大庾縣事徵收額賦析起存爲二起運則徵銀存留給發則銀穀布縷隨所便民甚德之既去祠祀以志不忘

南安府志

葉明元字可鳴福建同安人進士萬曆十一年知南安府事大庾學自天順時附郡學中道源書院亦廢明元入觀疏奏復之詔下撫按議竟如其請

南安府志

趙日榮字巨甫福建晉江人舉人萬曆十八年知南康縣事廉明惠愛甚有才略立社倉罷鹽餉置學田在任五年吏民皆懷畏

南安府志

洪有助字懋孫福建南安人萬曆二十年進士二十二年任南安府推官高潔明敏鄰郡之訟皆歸焉嘗攝大

廩南康縣事滌除宿弊立徵收串票法虛納增減之害以消累官廣州知府

南安府志

汪承鵠字仲修南直隸歙縣人進士萬曆二十三年知南康縣事操守嚴重葺學舍創旭山書院率諸生課鑿其中終嚴州知府

南安府志

林際春字字穉一字懸釜福建泉州人舉人萬曆三十八年知崇義縣事修解署繕城垣輯邑志廢墜畢舉升德慶知州

崇義縣志

董應圭字公執一字武銘浙江鄞縣人舉人任南安府推官一日夢庭下有呼冤者醒聞一鳥鳴窗外特酸楚應圭曰是必有異侵曉卽升堂盡出獄囚細鞫得王大寶一案大寶固巨憝與羣輩爲盜旣又毒死同謀者已

得脫隨以嚴刑訊之盡吐狀眾稱爲神巡按張銓上其

事官至保定府同知

據高斗光所撰墓志補

陳瑾字白岳廣西宣化人舉人天啟二年知南康縣事廉能明允斷獄如神一切無名之徵及健訟猾蠹皆力除之在任七載升海防同知

舊志 南安府志

龍文光字煥斗廣西馬平籍雒容人天啟二年進士四年知上猶縣事剔姦格頑境內安謐嘗立觀瀾社所著社約上猶士迄今猶服誦之調知新建民遮道乞留

南安府志

府志

宋本忠浙江山陰人崇禎末任南康典史流賊逼城城幾陷本忠晝夜巡防賴以固圉後竟殉難士民哀之

舊志

國朝

鄭思魯字明宇遼東東海州人順治九年知南康縣事性剛果處事平易易縣當殘破之餘流移者咸使復業改建文廟新諸門麗譙百廢具舉民德而祠焉

南安府志

白啟明字見宸漢軍鑲白旗人舉人康熙十六年任南安知府三藩變後田地荒蕪百姓乏食者眾啟明設義倉給牛種以振以耕流民多復業乃捐資贖還男婦之被掠者使完聚立義學延師使貧士皆得肄業飭保甲弭盜賊教養兼舉政化大行二十八年升分巡贛南道嚴革陋規詰奸除暴吏民皆畏威守法修荒政治城垣捐建書院文教聿興其實心施措如此卒祀名宦

八旗通志

贛州府志

梁爾壽字山公陝西涇陽人拔貢生康熙十七年知崇

義縣事兵燹後民多失所爾壽多方招徠貸贛州漕米以濟民之歸集者予以牛種牲畜又捐辦學宮民至今

感之

劉凝崇義
縣志

馬化龍字雲津奉天人康熙二十年知南安府事革火耗除科派倡修文廟開設義學政聲大著

舊志

張爲煥字允文江南崑山籍太倉州人康熙九年進士由雲南知縣改補崇義時兵變楚粵盤踞峒穴者猶未盡戢爲煥至歎曰去萬里外之洱海又蒲伏此箐嶂其命也夫雖然要有前策在乃師王守仁橫水方略表險要置土兵編閭伍嚴保甲風俗稍馴乃興學課士重葺守仁祠尋以老乞歸

舊志

靳襄字天垣漢軍鑲黃旗人監生康熙二十八年由杭

州理事同知擢南安知府作興學校緝盜安民除火耗
禁陋規免徭役葺城垣歲旱步禱甘霖立沛升天津鹽

法道卒

入旗通志

陳奕禧字六兼一字香泉浙江海甯人監生康熙四十七年知南安府事甫至官卽爲所軍力陳扳運之累遂得永禁減免陋規纂修郡志庶政畢舉卒於官南安府志何多學字未非廣東連平人舉人知南康縣事廉正勤敏遇事敢爲康熙五十四年北鄉譖言兵變奸民乘隙竊動勢洶洶多學聞之卽率吏役數人往或勸駐塘江以伺變不聽倍道馳至其地勸諭解散一方帖然南安府志游紹安字心水福建清人雍正元年進士十年由刑部郎中出知南安府愛民養土改建道源書院於東山

修舉廢墜不遺餘力凡有興作輒以詩文紀之禁溺女
錮婢尤政治之大者在任十有八年以老乞歸

南安府志

高顯宗字宜堂江蘇吳縣人舉人乾隆十七年知上猶
縣事至官甫一月上新地賊何亞四等謀亂顯宗聞之
會營官率兵壯夜抵賊巢乘賊未備一鼓捕擒之餘匪
亦以次就獲未及敘勞而卒

南安府志補正

李干齡四川宜賓人舉人乾隆三十三年任南康知縣
清慎廉介居官如治家然凡所鞠讞務求詳審不枉抑
一人以故獄無留滯士民多感戴焉

四川通志

黨兆熊陝西華州人進士進士題名碑作王兆熊陝西
長安人乾隆四十六年進士乾隆五十三年知南康縣事廉潔自持愛民息訟縣俗
多藉命誣訐兆熊嚴諭禁止懲誣控釋株連民乃不累

而鬪毆之習亦衰

南安府志補正

劉繩武字紹衣四川灌縣人舉人嘉慶二十五年知南康縣事潔已愛民安良除暴時有游民肆劫拘爲首者重懲之而令自陳過惡尤惡命案誣累之害遇則嚴治株連者立釋去任後三年復來宰邑未下車奸暴聞聲

斂迹一境肅然

南安府志補正

李廷錫字康侯一字碧山湖北安陸人道光二年進士十年知南安府事南安地瘠而民貧多會匪廷錫緝之嚴匪以斂戢聞城中久淹親柩者以萬計曉諭之令悉出募管內地多蔗少稻每仰食於贛州十一年歲饑贛收亦歉贛守出示閉籬廷錫豫稟大府委官購湖廣穀以濟明年三月饑民來就食者數千穀將不支廷錫亟

請於南贛道借倉穀九千石自運還郡中途舟覆浮水登岸若有物負之者然士民同聲稱神助於是出穀平糴復豫籌積儲以備荒慮屬縣之畏領穀累也詳請津貼銀一千九百餘兩又勸諭民開多種稻穀自是南安之民緩急始有備郡徵冊舊無券根胥吏侵漁官民交受其累廷錫改用魚鱗冊按戶稽查計糧榷算徵收秩然贛州各屬咸援以爲式十四年謾江西糧道尋調南昌府知府擢陝西督糧道署按察使治獄忤上官意被劾歸金國鈞撰傳

効歸

金國鈞撰傳

光杰所撰墓志銘

金

劉有慶字芸軒一字馨圃直隸南皮人道光九年會試第一成進士十一年知南康縣事值頻歲饑僅奸民藉詞攘奪有慶捕首亂數人杖殺之而集紳富設廠平糴

貞善以安黠者亦相戒勿犯善折獄析理至精所判或與古人相類在任數年庭無冤滯邑人頌神君焉調知玉山亦有善政十四年奉檄入閩舟次鄱湖墮水死二縣人傷之咸相率建祠以祀

南安府志補正
廣信府志

張熙字春旭直隸鹽山人舉人道光二十七年知南康縣事折獄懇懇如家人父子嘗有感泣不願終訟者催科不遽辱民以枷杖曰吾不忍以緩急亡其廉恥也家素貧約操守益嚴久之丁役亦相競勸所得廉俸盡以資養士卹因振貧育嬰諸事在任二年致仕去

南康縣志

王秦州字棫樸浙江紹興人初補大庾典史會粵賊竄入南雄州境泰奉檄治軍務有能聲尋遷義寧州吏

目城陷遇害事

聞贈卹如例

大庾縣志
檔案

卓爾歡滿州正白旗人由佐領歷官甯都營叅將調署

南安咸豐八年城陷卓爾歡巷戰死之事

聞贈卹如例

大庾縣志
檔案

葉球字叔華安徽桐城人道光二十年進士改翰林院

庶吉士散館授兵部主事咸豐八年由郎中出知南安府時賊氛正熾甫下車卽籌防禦練士卒一以大義相激發既而賊攻府城球登陴守禦七晝夜援兵不至十一月晦城陷麾兵巷戰不勝與從兄璲從子恩壽等皆死之事

聞贈卹如例

江西忠義錄
南安府志

黃榮庚字星舫福建長樂人道光三十年進士以知縣

分江西咸豐四年署定南同知禦土賊有全城功八年
由龍南令調權大庾縣事賊從信豐閒道至榮庚督戰
遇害同時有典史張翰者安徽人攝府照磨事城陷死
之合家皆殉焉事

閩贈卹如例

贛州府志
續案

陸鈞浙江人咸豐九年任上猶縣丞死粵賊之難初有
以去諷者鈞曰官守之責生死以之惟力守以待援耳
事

閩入祀昭忠祠

上猶縣志

宦績錄十六

贛州府

陳謹案自陳以後舊志所載虔化瑞金石
城諸縣宦績今並改列甯都直隸州

宗元饒南郡江陵人太建閒遷南康內史性公平諳曉

故事明練治體以秩米三千餘斛助民租課有問高年

拯救乏絕百姓甚賴焉課最入朝加散騎常侍終吏部

尚書

陳書

謹案舊志宋有王欵之傳其事其人均誤辨詳職官表

唐 南唐尉

許圉師安陸人舉進士龍朔中爲左相左遷虔州刺史
政存寬惠人吏刊石以頌之嘗有官吏受賄事露圉師
不忍按但賜清白詩以激之犯者愧懼遂改節爲廉士
其寬厚如此

汪舊唐書

張九皋曲江人九齡仲弟弱冠孝廉登科嶺南按察使
裴佃先表授海豐郡司戶參軍及佃先討五溪蠻奏授
贛縣令軍興倚辦供億無留宣慰使梁勦竹承構先後

以戶口增益清白有名奏舉進朝散大夫尋改授南康
別駕累遷殿中監尙書職方郎中

贛州府志

裴諝字士明河東聞喜人大厯閒出爲虔州刺史削煩
苛從簡易不期月而令行會歲旱諝禱於儲潭之神翼
日大雨從弟曄撰祈雨感應頌勒之廟中

贛州府志

路應字從眾京兆三原人以父嗣恭蔭爲著作郎貞元

初出爲虔州刺史鑿贛石梗險以通舟道終左散騎常

侍唐書謝志原案林志云應奏割等都地置安遠縣
人不病饑而

官府有蓄積

張署河間人德宗時以進士舉博學宏詞累遷虔州刺
史俗朋比殺牛又好放生以祈福署一切禁絕使通經
吏與諸生之旁大郡學鄉飲喪婚禮張施講說民吏從

化度支符下折民戶租歲徵綿六千屯比郡承命惶怖
署獨疏言嶺民不識蠶桑難以供辦遂得免民相攜守
州門噭謹爲謝改澧州刺史終河南令

韓昌黎集
贛州府志

馬總字會元扶風人元和初爲虔州刺史廉清不撓用
儒術教其俗政事嘉美厯官太平軍節度使入爲戶部

尚書

唐書
昌黎傳
韓

李景邊字宣遠南唐烈祖子元宗嗣位封保甯王徙封
信王出爲百勝軍節度使簡易節儉虔人安其政時諸
王大臣皆喜浮屠獨景邊非毀佛書專以六經名教爲
事贛令卒尉邵繼良攝令事以令成喪日張樂宴飲景
邊立奏黜之後主立進封江王在鎮十二年開寶元年

薨年三十一贈中書令諡昭順

據十國春秋補

江西通志卷一百三十三 贛州府
謹案舊志有王揆周章二傳今改列甯都直隸州

宋

楊澈字晏如建州建陽人建隆初進士江南平以著作郎通判虔州令就大將曹彬分兵以行既入境僞帥郭再興擁兵自固澈單騎直趨其壘諭以朝廷威信再興卽委符聽命澈悉料城中軍士之勇壯者凡五百人爲一綱部送京師土豪黎羅二族聚眾謀亂澈率兵平之

遷左贊善大夫

豫章書
贛州府志

王協太平興國間知虔州奏析贛縣地置興國縣

嘉靖林志

謹案王協贛州府志無傳置縣事亦不見興國縣志僅賴林志存之今仍其舊

陳從易字簡夫泉州晉江人進士及第知虔州會歲大饑有持杖盜取民穀者請一切減死論凡生者千餘人

宋史

張式字景則建州建安人天禧進士景祐閒知虔州虔於東南州爲最劇式鎮撫之以無事三司市綢絹十餘萬非經數式拒弗市民以守爲有賜也式廉靜好書長於政事見時事有不便往往能極言之無所忌所居官既去而人見思仕至尙書祠部郎中

王制公集

陳希亮字公弼眉州青神人天聖八年進士知雩都有老吏曾腆舞法粥獄以希亮年少易之希亮廉得其重罪腆叩頭出血願自新希亮戒而捨之暨修學腆捐家財助官遣子入學卒爲善人巫覡歲斂民財祭鬼謂之春齋否則有火災民謠言有紺衣三老人行火希亮禁之民不敢犯火亦不作毀淫祠數百區勒巫爲農者七

十餘家及代去父老送之出境泣拜曰公去我恐紺衣老人復出矣

東坡居士集

程珦字伯溫河南人慶歷中以大理寺丞知興國事邑素號難治而衣錦鄉尤甚前令攝以威益不服珦善教之與他鄉一視民遂信從江西民善爲贖券爭人田旁邑有訟積十餘歲不能決部使者委珦根連珦獨呼爭者訊之不數語盡得其實人以爲神假倅南安軍累轉

大中大夫卒

贛州府志

程勸字勝之許州陽翟人少爲學舉進士甲科仁宗時通判虔州州人有殺母暮夜置尸他人之門以誣仇者獄已具戡獨辯正其罪厯官參知政事安武軍節度使

卒謚康穆

宋史

趙抃字閱道衢州西安人景祐元年進士及第嘉祐中由右司諫出知虔州虔素難治抃御之嚴而不苛召戒諸縣令使人自爲治令皆喜爭盡力獄以屢空嶺外仕者死多無以爲歸抃造舟百艘授之并給道里費以恤仕宦之不能歸者改修鹽法疏決贛石民尤賴其利

宋史

統志明

沈希顏字幾聖明州鄞縣人嘉祐八年知雩都縣事公宇有妖禽夜唳甚哀希顏題詩於所棲樹遲明禽飛去縣西峽路崎嶇鳩工開鑿遂爲坦途

贛州府志

孔宗翰字周翰孔子四十六代孫登進士第知仙源縣爲治有條理王珪司馬光皆上章論薦遷知虔州城濱章貢兩江歲爲水齧宗翰伐石爲址治鐵鋼之由是屹

然詔書褒美厯陝揚洪兗州皆以治聞

宋史

錢顥字安道常州無錫人慶厯六年進士以祕書省著作佐郎知贛縣事修孔子廟新冠服禮器治行著聞治平末以金部員外郎爲殿中侍御史裏行蘇軾贈詩有烏府先生鐵作肝之句因號鐵肝御史

宋史
贛州府志

李先字淵宗許州臨潁人起進士爲虔州觀察推官攝吉州永新令兩州俗尙訟先爲辨枉直皆得其平知信州南安軍撫楚州所至治官如家人目以俚語在信爲錯安頭謂其無貌而有材也在楚爲照天燭稱其明也積官至祕書監致仕

據宋史本傳補

劉磼字執中福建懷安人幼介特嘗師胡瑗擢進士熙甯中以運判知虔州虔俗尙巫鬼不事醫藥彝著正俗

方以訓斥淫巫三千七百家使以醫易業習俗遂變時
饑民多棄其子彝立法收養日給官米二升月一驗視
一境無夭閼時有甘露瑞蓮瑞粟之應城東北瀕江彝
作水窗視水消長而啟閉之水患遂息元祐初召爲都

水丞

豫章書

王鬲字景和建甯崇安人皇祐進士熙甯中以著作郎
知雩都縣事民素嚚訟鬲圖古人之孝義者列其事勸
誘之逾年訟息縣南有泉灌田千頃忽產鉛錫使者欲
置官治鬲力爭遂寢其議改朝奉郎判婺州

贛州府志

楊時字中立福建將樂人熙甯九年中進士第授汀州
司戶不赴杜門力學數十年元祐間調徐州司法改虔
州州有疑獄眾所不能決者一一剖析之累官龍圖閣

直學士卒謚文靖

嘉靖林志
贛州府志

謝麟字應之歐甯人嘉祐進士元祐閒知會昌縣事有民被酒夜與仇鬪既歸爲親屬所殺其家誣仇者獄久不決麟知死者無子所親利其財故殺之鞠實治如律

邑稱神明

贛州府志

蔡懋字子堅仙游人襄曾孫靖康中爲會昌尉遇賊犯境領所部及土兵禦之力戰遇害贈承事郎官其子

贛州府志

志

魏懋字覺民甌甯人第進士紹興初知雩都縣事江西盜起虔諸邑多殘破懋乃出帑金犒士誓與死守寇攻城累日不能克遁去後岳飛領兵至見雩之井邑獨案堵如故甚稱賞之

豫章書

劉藻字廷潔南雄人

一作昌人

紹興十四年知雩都縣首

興學校勸民織且耕刊前令王鬲所作孝義圖使民誦

習又修城池以捍外寇其設施皆中程度云

贛州府志

李畊失其籍貫先爲忠州團練使紹興二十二年禁兵

齊述殺統制吳進同統領馬晟據贛州叛畊奉詔致討兼知州事朝廷屢下金字符許從招撫畊遣辯士諭以禍福令出降不聽乃大治攻具刊木輦石力戰克其城盡收賊黨誅之捷聞轉觀察使畊遂驅灰燼以立治所及爲叢冢葬死於兵刀者

豫章書

趙善繼宗室子紹興二十四年知贛州事以興學宣化爲先務府學舊毀於火善繼至始得重建居恆勸民爲善頑梗者必以法繩之踰年風俗稍變訟牒亦希

贛州府志

趙公偁宗室子紹興中知贛州事隆興二年州有寬牘
錢十餘萬緡公偁因請代輸夏稅以休其民

贛州府志

高照邵武人以進士任贛州司理參軍有盜驅脅良民
利賞者捕之將論死照察其枉出繫者百餘人

贛州府志

段秀實隆興元年知龍南縣事時縣治毀於寇秀實嘆
曰百里之地惟民具瞻積歲不理令之恥也率吏民肇
築土城凡廳堂庫舍之屬以次復之費出有經民不知

擾

嘉靖林志
贛州府志

羅願字端良一字存齋徽州歙縣人初監饒州景德鎮
稅有能名乾道二年擢進士第授鄱陽知縣不樂往主
台州崇道觀八年通判贛州攝守事寇攘甫定一以政
清訟簡化美風俗爲務部使者列其治行以聞厯知鄆

州卒

贛州府志
新安文獻志

留正字仲至泉州永春人紹興十三年第進士知贛州奏減上供米不報及爲相蠲一萬八千石改隆興府以簡素化民有惠政累官右丞相致仕卒贈大師

宋史
南昌府

志

趙善佐字佐卿宗室子居於邵武湻熙中知贛州事奉法愛民以勤儉自約敕不妄費公帑于請一無所應在任踰年卒

贛州
府志

王柟字木叔溫州永嘉人乾道二年進士累官祕書監湻熙中出知贛州先禮教後刑罰先是元祐黨禁贛士與者十四人相舉以諭其耆老曰汝州多正人如此將百世稱之後生可不勉乎民皆興起遷善遠罪或夜不

閉戶俗工麻芒鮮絲績相課種桑多者減役贖罪贛廣
聞嘗以歲杪販鹽空聚落往返號鹽子所過輒殺傷官
軍故有鹽子獄相申嚴保伍須行者給憑乃聽由是十
省八九提刑者意不合毀之於朝罷主沖佑觀士民雪
涕前後擁不得行相曰太守數易古矣今不去後當去
耳賦詩留別贛人刊而祠之

葉水集

司馬達字及之文正公光裔孫慶元三年知贛縣事時
學舍久圯諸生皆依郡庠達至官以次修復舊廩歲輸
二百斛緡錢僅以百計達括六鄉閒田所入益錢至三
倍請於州選補諸生使寢食於學月書季考以督厲之

文風郁然

案周必大贛縣學記
案贛州府志作司馬達謹

莊夏字子禮泉州人淳熙進士慶元五年知興國縣事

永豐民孫六毆妻妻自剄死六懼夜昇屍興國田中宣
言盜自興國掠殺夏密令人視六家則土屋繩樞死者
又蓬頭禿項也乃面詰六曰盜何利而劫掠及汝乎六
語塞自是民不敢欺嘗卻添給錢九十餘萬以五十三
萬爲下戶輸逋餘以給公家之役

贛州府志

鄒應龍字景初泰甯人慶元二年進士開禧初忤韓侂
胄以直龍圖閣權知贛州建慈幼院牧養民間所棄子
女寒暑有衣疾病有藥襁褓盥櫛各有司存所賴全活
甚眾遷江西提點刑獄終資政殿學士卒贈少保

宋史
贛

志
州府

萬億嘉定二年知信豐縣事縣當寇衝舊無城築庀工
傭役百雉屹然先是有識云上門驅山下門塞海若要

成城除是萬載至是乃驗

嘉靖林志
贛州府志

陳孔碩福州侯官人登淳熙進士嘉定閒令瑞金有古良吏風旋知贛州事摧強植弱子惠黎元先是豪家沿江障水作碓以射利水湍駛舟行多覆孔碩盡去之前患乃息子韓軾同登開禧進士軾知瑞州韓紹定閒復知贛州進江西安撫使自有傳

贛州府志

趙汝回大梁人紹定四年任會昌軍原作會昌州誤時閩廣寇起民庶皆竄徙邑里蕭然汝回召義勇教之兵法爲戰

守備修其城隍以待之招流通實村落寇知之竟不敢

犯

嘉靖林志
講案舊志作
經興開今改依府縣志

楊玏字君寶慶元府鄞人紹定二年進士淳祐元年調贛州教授廩餼不給玏捐私橐以助郡守徐琛叟會宴

有伶人以先聖論語爲戲珏白守寘於罪改知德興縣

治姦民之跋扈者又節羨錢二百萬置米千斛實之倉

時出以平市價貧者咸德之官至朝議大夫知肇慶府

舊志誤作知饒州謹案知德興縣
今改正

楊大異字同伯醴陵人嘉定十三年進士調龍泉尉山

寇剽掠入境大異擊郤之省災恤民惠政甚著忤提刑

趙與籩移尉安遠邑有洞寇擾民官兵致討積年弗獲

檄大異往治大異以一僕負告身自隨肩輿入賊洞諭

以禍福皆伏地叩頭矢願湔洗乃留告身爲質偕其渠

魁數輩出降敘功遷吉州戶曹

據一統志補
安府志補

黃邦彥字退翁處州縉雲人嘉定十五年進士湻祐閒
知雩都縣事吏以治盜請邦彥曰以民視民何忍爲盜

作廉寬公勤四銘刻於邑治以勸後人盜風遂息歷官

至朝散大夫

據浙江通志補
剛直通敏鋤強拊弱遇災則發廩振救四

謹案贛州府志稱邦彥

民樂業則所以清盜之源者至矣固非徒恃文告以爲治者補錄之爲循吏誠民者法

謹案舊志有孫復陳剛中薛弼吳柔勝四傳復傳止載

撰孔子廟碑一事剛中傳存詩二句皆無贛郡政績弼

事則屬福州柔勝爲吳淵吳潛之父宋史有傳乃宣州

人非溧水也本傳言調都昌簿差嘉興府學教授爲御

史湯頃所劾閒居十餘年並無被劾後改贛縣尉之事

舊志蓋本贛州府志贛志則沿江甯府志之誤乃方志

附會之詞不足爲據今與孫復等並從刪汰

元

陳泰字志同茶陵人延祐進士爲龍南尹興學卹貧境內安治會信豐洞賊掠境泰率民與戰於犁鼻山敗績死之士民悼痛收葬馬鞍山之原立祠祀焉

贛州府志

呼圖克羅丹原作古字志道蒙古人至正中爲贛州路

魯萬丁

字志道蒙古人至正中爲贛州路

達嚙鳴齊

原作達
魯花未

廉知郡中豪右武斷因獄爲市者悉

裁以法不數月令行禁止因嘆曰吾民幸知向背不進

之以禮未善也於是飭學舍延師闡明教化俗亦少變

贛州府志

謝志原案陶宗儀續譜錄載呼圖克羅丹

守贛州路任滿歸除時有故吏邱某往臨江貼補介呼圖克羅丹書見總管茂巴爾庫辦才既錄用就遣邱持俸銖五十錠餽呼圖克羅丹益夙知其廉故分財以濟之也邱竟匿其鈔其後茂巴爾數得呼圖克羅丹書而謝不及此疑焉因便使問之呼圖克羅丹知爲邱匿具書請失謝之罪邱聞惶赧奉鈔還呼圖克

羅丹終卻不受且隱其惡未嘗與人言

鄭紹字仲賢徽州歙縣人初任南安總管府提控案牘取吏有方文書清簡至正七年升從事郎知零都縣事旁都故多訟吏白紹當以法繩之紹曰吾與之相安無事訟何由生居歲餘獄空訟息郡長遣使宴勞仍命訓訪旁縣民病遂申興國縣民之冤未幾寇犯江西贛之

屬邑皆陷獨雩都賴紹所作新城示以守禦之策得無
恙尋撫諭葛均平頭印山青塘等寨縛首惡五十餘人
送郡亂由是息十三年御史臺選爲西湖東道肅政
廉訪司經歷進徵事郎未及赴以疾卒於官

據危太模集補

噶海齊

原作哈海赤

多力善射至正十六年繼沁布阿咱爾

原作全普庵撒里

守贛憑城禦賊尤有功食盡或請出降噶海

齊曰奉命守土何敢負國爾父老完首領保妻子宜也

我固自有處及被執賊將脅之使降噶海齊曰與汝戰

者我也爾賊無殺贛民當速殺我耳遂遇害

元史忠義沁布阿咱

海桑集爾傳陳

王榮忠字君直岳州人至正閒爲贛州判官時淮寇擾
甯都掠興國陷會昌榮忠與賊戰勝之克復諸縣尋移

海桑集

駐雩都始建城堞募義勇爲守禦計亡何循汀賊五千
奄至城下攻圍三晝夜榮忠身先士卒冒矢石出戰又
收公私銅鐵鎔液澆注賊遂潰率兵追擊大破之雩都
民羅拜曰再生我者公也以功升同知總管府事

豫章書

贛州府志

朱克敬字仲恭至正末任興國縣尹邑常賦七千屯田
雜賦尙不與自吳南唐割據歲倍取之民不堪命克敬
上其事於府不允則率吏民伏庭泣訴當道憫其誠與
之申達未幾命下民額手相賀

汲水志林

明

崔天錫字彥才贊皇人由賢良舉用厯官有聲太祖吳
二年取贛州卽以天錫知贛縣事草昧之際事多創造

重建縣治及明倫堂濂溪書院造浮梁以濟章貢二水先是至正戊戌邑罹兵火版籍蕩然原額糧五千七百石有奇至是失額公私交病天錫多方訪求令民具實自陳互相參覈既有次第復按行封畛度田廣狹肥瘠率三十而稅一久之復業輸糧如初在任九年升廣州

知府

一統志
贛州府志

鄒奕字宏道吳江人元至正中進士洪武中由御史出知贛州府時天下初定郡縣規制一切草創奕至則建社稷壇於西津門風雲雷雨山川壇於鎮南門置厲壇於府城北皆遵洪武十年定制又建遞運所館驛陰陽醫學百廢具舉坐事謫甘肅永樂初以塞義薦召還贛

府志

楊霄遠廣東南海人洪武閒任安遠縣典史地曠民寡

役賦煩重霄遠考績時奏減賦額民始樂生爲立祠以

祀

嘉靖林志案安志作楊霄漢謝志原

查允中休甯人洪武二十一年知雩都縣事時流賊犯

境征南將軍帥師進討允中應給軍需不以擾民及賊

平撫集黎民奏蠲糧額民甚賴焉

嘉靖林志

黃六八福建甯化人洪武閒知會昌縣事時有草寇剽
劫六八請兵勦捕饋餉不絕人多才之又奏除賦稅以
安貧民立軍鎮以資捍禦遂爲定制

嘉靖林志贛州府志

陳九思浙江人洪武二十二年任龍南教諭時寇盜之

餘田荒業失民苦征輸九思奏免贛郡秋糧三千有奇

民困以蘇祀名宦

贛州府志

李子昭博野人洪武中以人材舉爲信豐丞自廣寇剽掠之後民竄田荒子昭奏蠲稅額十之八又請立戌屯田爲守禦備自是流亡復業

信豐縣志

戈文七金壇人洪武二十四年知龍南縣事值兵火之後百事廢墜文七奏減糧稅省冗官招徠流徙勸課農

桑在任三年民懷其德

嘉靖林志

唐子儀名文鳳以字行歛縣人洪武中以文學徵三十一年知興國縣事教民力本務農嘗出郊躬勸勞之造士日有程課寒暑不輟擢趙王府紀善

溢水志林

陳大本無爲州人洪武中任贛州府同知撫民以寬應務以敏尋升本府知府吏民熟其政教事不勞而集遷

浙江參政

明一統志

王文孜字叔勤浙江遂安人永樂元年任會昌知縣

江浙

通志作洪武三十二年任廉惠愛民其父嘗貽書以貪墨爲戒文孜

守父訓益加砥礪門無私謁囊無贋錢安養生聚者數

年民用殷富

據贛州府志浙江通志補

許庸廣東石城人永樂四年知會昌縣事性敏決庭無滯訟每遇工作負者驗丁役力富者量財供費民樂趨事積年逃卒皆聞風自歸在任八年以艱去民思慕之

一統志
贛州府志

李素字宗文廣西蒼梧人永樂二十二年進士宣德元年知贛縣事修廢舉墜祐蠶釐姦得良牧之體邑之橋梁學舍皆其剏修也歲荒勸富民出粟以振秩滿報留進正六品俸踰十五年始以憂去

一統志
舊志

黃恭南直隸松江人舉人正統中知贛州府事精敏有才盡心民事尤惓惓於學校去後民有餘思

贛州府志

鄭述浙江錢塘人舉人正統初任贛州通判莅事有聲

十三年閩廣盜起百姓惶懼逼率丁壯萬餘人設法防禦一境獲全尋升知府以憂去

贛州府志
浙江通志

王學古交趾下洪州人貢生正統四年知信豐縣事招徠蠻洞列爲編戶里甲以增巡撫侍郎楊甯奏其功進階六品復任九年乃致仕後家信豐

嘉靖
林志

陳連福建莆田人舉人正統初知興國縣事清勤不懈多惠政長信里堰塘連所修築也以母喪去民走訴大府挽留之得請於朝服闋再任

贛州府志

黃振福建沙縣人正統閒知安遠縣事慈祥愷悌喜怒

不形在任九年人感戴之

嘉靖林志

唐瑜湖廣辰溪人舉人正統九年知龍南縣事自洪武末裁并學校以生員隸郡庠贊舍遂廢瑜疏請復之得旨仍設師生名額依例科貢

贛州府志

丁杰浙江定海人初爲興國縣訓導正統十一年攝龍南學事流寇猝至杰方率諸生講學寇脅以利刃杰端坐不動曰吾方以聖賢之道教人乃爲汝屈邪寇怒遂殺之

據贛州府志補

袁璣南直隸鳳陽人會昌守禦所千戶熟嫻韜略善撫軍士正統十四年閩寇犯境璣嚴爲備禦以功升指揮僉事

據贛州府志補

張勝湖廣麻城人天順六年任秀都典史長河峒賊竊

江西通志卷一百三十三贛州
發勢甚張勝率民夫陳世用等禦之賊圍急援兵不至皆死於陣

方都縣志

顧睢字明德南直隸長洲人正統元年進士改翰林院庶吉士天順末由福建副使謫知贛州府長河峒氓贍悍時出剽掠縣置不以聞睢疏言用兵事宜遂平之賜以金綺睢有治才遇事裁決無難易皆立辦豪猾斂手莫之敢欺

贛州府志

楊友諒雲南廣通人監生成化三年知龍南縣事仁厚誠樸實心愛民會司府檄覈田升科友諒力言不便事遂寢入祀名宦祠

龍南縣志

姜連浙江蘭谿人天順四年進士成化七年由海甯知州遷知贛州府洞悉民隱政教修明繕城隍實倉廩改

建郡縣學植良鋤惡治行爲江右第一

一統志

嘉靖林志

章廷珪舊志作廷圭字文瑞南直隸銅陵人

舊志作石埭人

舉人成

化八年知興國縣事以興學勸農爲務寇躡鄰封且及

境廷珪選丁壯教以武略寇不敢犯有甲乙相搆甲病死昇屍以誣乙塗之於庭遂爲厲乙家暴死者三人廷

珪廉得誣狀罪甲而屬息邑有牛牯陂治高不能通水

廷珪相度上流鑿石引水自蘇陂至竹壩延袤二十里

歲增穀數千石遷倅武昌舊志作衡州

補贛州南郴峒寇李

福正剽掠殺人出沒汀邵間廷珪相機擒之四封晏然

贛州府志

項德輝福建連城人舉人成化十四年知龍南縣事舊例秋糧轉運於郡暨會昌興國等縣灘高石險時有漂

捐領運者苦之德輝疏請改折民困大蘇

贛州府志

梁潛字孔昭廣東番禺人舉人成化十六年知會昌縣事居官廉勤修墜舉廢加意學校農桑撰輯縣志長河峒素稱頑梗地潛至峒民咸聽教令編戶日盛邑治政

觀

贛州府志

達泰浙江麗水人舉人成化中知興國縣事時流寇肆毒鄰封適霪雨城壞民甚恐泰併力修葺寇不敢犯卒官民立祠祀焉

贛州府志

王廷珪湖廣郴州人舉人成化十九年任贛州府同知練達果敢明年流寇犯境率民兵奪戰援絕力屈死之

事聞進階四品錄其子

一統志

贛州府志

李璉字純夫南直隸懷甯人成化五年進士二十年知

贛州府事郡罹大水繼以疫斑竭力振濟全活甚眾聞
廣流寇犯境率民兵連擊敗之士民感頌不置

一統志豫章書

張獻字孔圭福建浦城人舉人成化二十二年授贛州
府推官治獄多所平反汀韶寇侵境重以饑疫獻持檄
走諸邑增治城濠勞來周恤民賴以安秩滿升本府同
知會清軍御史某以苛察繩下獻抗言見抵遂移疾歸

贛州府志

甘文紹廣西桂平人舉人宏治二年知安遠縣事邑故
土城陶甓改築當流寇擾攘後廣積儲以備儉歲文廟
公署之屬創建一新升瑞州府通判

贛州府志

黃世忠字孝卿福建長樂人舉人宏治初知贛縣事以

民俗尙鬼毀淫祠百餘爲詩徧諭百姓百姓化之以憂

去

嘉靖林志
贛州府志

蔣曙字景明廣西全州人宏治九年進士知贛縣事先
是郡中職清軍者歲計三分以爲政績故軍絕百餘年
猶械繫遣送曙至核其實一一分辨之請於清軍御史
除豁者甚眾然猶未盡越二十年曙遷江西右轉總清
軍事力請於巡按朱袞爲之覆疏曙入覲又請於兵部
絕軍之續補者俱得如所奏名數盡除其籍民獲更生

贛州
府志

陳梁字伯棟陝西涇陽人舉人正德四年任贛州府同
知時有賊僭僞號擁眾數萬掠郡縣上官委梁往討之
梁以計誘執賊百餘人又遣人分諭諸賊使解散賊黨

悉平城南章江人病徒涉梁作石橋往來者稱便

通志陝西

徐珪湖廣應城人正德五年任贛州府通判招降盜魁

何積玉已復叛下珪獄尋釋之後以平盜功擢知州

據一

補統志

朱諫字君佐浙江樂清人宏治九年進士正德八年知
贛州府事大帽山者界閩廣延袤千餘里中多谿谷賊
憑要害時出爲民患諫舉兵壓賊境歷盤龍嶺諸寨下
令曰能捕賊者卽以所得賊貲與之人懷利競進旬日
殲其渠魁俘數千人餘眾悉降乃散置安遠龍南諸境
給以牛糧遂盡爲良民移知吉安謝事歸

一統志舊志

邢珣字子用南直隸常熟人宏治六年進士正德十年
由南京工部郎中遷贛州知府招降劇盜滿總等授廬

給田撫之甚厚後討他盜多藉其力巡撫王守仁征橫水桶岡珣常爲軍鋒功最增二秩宸濠反以重賞誘總執其使送珣遂從珣共平宸濠遷江西右參政世宗錄功增秩二等明史伍文定傳

白志

黃泗福建福清人舉人正德十一年知興國縣事先是劇賊鍾仕錦何積玉騷動江廣閒文黨掠興國縣泗至值焚蕩之餘民日夜相驚謂寇旦至乃募壯丁守城治城置警鋪二十四以處之建樓城上城壞者復修之按追田塘之侵蝕者以贍學毀諸淫祠巡撫王守仁提學唐龍皆嘉其績贛州府志

吳誠字明卿廣東瓊山人舉人嘉靖十四年任龍南知縣釐夙弊四十餘條申禁令絕苞苴泊聲赫然沙頭賊

徐守沐僭號倡亂官司不能制謝鉞李鑑者巡撫王守仁勦三浰時用之以撫輯阾洞者也積久多骯法誠廉得其狀召至出軍門檄示之曰將逮戮汝能擒沙頭賊自效者貰罪且論功鉞鑑卽誘守沐擒之支黨盡滅境內晏然所著有雁峯詩集

贛州府志

趙承謙字德光南直隸常熟人嘉靖十七年進士十八年任贛州府推官贛俗嚚訟其豪仰刀筆以食持富人短長稍不給輒文致其罪黨與更迭爲證承謙至廉得其狀杖逐之一郡稱快攝贛縣事劇盜劫縣尉去欲挾以攻縣承謙從兩隸單車至盜壘陳說利害盜叩頭詣死送尉出又攝甯都縣事當振而御史行部至郡承謙曰吾不忍以饑民易御史懼也畢振而往司理三年凡

七登薦剡有齧之者僅擢南吏部郎厯官至參議

弇州史料

祝詠字鳴盛湖廣衡陽人嘉靖八年進士二十年任贛州知府廉正持法雖撫按無所撓郡境多盜憲司令賞捕盜者詠訶其賊不實乃屏人謂曰吾知某非盜奈何枉之瞋目視捕者不能置對具吐實立反其獄憲司不勝忿與巡撫共排之詠再引疾去上不聽尋升按察副使終陝西左參政

分省人
考

林萬潮字養晦福建莆田人嘉靖十七年進士二十五年補贛州府推官謙沖周慎不以喜怒加人攝興國縣事重建安湖書院以課諸生信豐大水奉檄往振臥署行郵鴈中計口授食凡活數千人竟以病卒

贛州府志

盧二字忠獻廣東南海人嘉靖二十三年進士二十六

年知興國縣事設匱於門務求已過察民隱縣有虛糧
千六百石民苦之逃亡日眾亡履畝清丈正經界平等
則民力稍紓遷潼川知州豫章書

王春復字學牧福建晉江人嘉靖十七年進士先知泰
和縣禮士愛人嘗造實徵總冊以剔糧弊省併淘金浩
溪二驛以節勞費惠澤在物人思王侯比守贛州益簡
靖不擾丙辰大水春復乘筏拯溺所活甚眾未幾有大
木之役條上便宜視諸府費爲省時流寇覘知督木者
有積貲從石城越會昌將薄零都督府遣二材官偵賊
爲所執遠近洶洶春復提兵出結營四十里外招以先
聲賊聞氣阻不敢進尋釋二弁歸累官貴州按察使福建

李丕顯字憲文福建長樂人嘉靖十四年進士任贛州知府清靜無阿曲巡按御史行部有所督過及審讞輕重不相得必爭之不少徇亢旱禱雨暴赤日中遭疾卒

贛州
府志

李鳳朝貴州人歲貢生嘉靖三十七年任信豐主簿時三巢賊賴清規等掠城下鳳朝督兵出戰屢破之追入青祁谷賊據山逆戰鳳朝奮力先登爲賊所害數日得其屍顏色不變邑人哀之呼其山爲王簿腦

信豐
縣志

雷上儒字應聘湖廣嘉魚人嘉靖三十二年進士四十年知贛州府事當辛酉之亂徵發旁午上儒從容應之未嘗詭乏督府志在滅賊慮州人之爲賊耳目也設廳轅門以來告密時贛州民黎氏劉氏趙氏先世有田

在龍南適鄰賊巢仇家遂舉其名指爲通賊逮捕下獄
將戮之以徇上儒請訊不可請緩決又不可明日且出
旗牌縛以赴法上儒趨入反覆陳說泣數行下督撫爲
之感動良久起謝曰君誠篤君子也豈欺我哉遂釋之
三家子姓立木主以祀數世不衰

安志

應本泉浙江永康人嘉靖四十一年任安遠主簿時三
巢賊出劫無虛歲本泉領兵捍禦親冒矢石與士同甘
苦累有功升永新縣丞

安志

李多祚字可久湖廣石首人舉人嘉靖四十一年知安
遠縣事時三巢構亂大石小石伯洪三保俱被脅從腰
古丹竹樓等保又皆新民就撫者多祚駕馭得宜每遇
寇警率鄉兵禦之新民亦知自效下厯之役擒斬招降

以千計寇平流移千餘家盡復其業乃築城南逕以據要害在任九年升潮州知府

安志
贛州府志

續

海瑞字汝賢廣東瓊山人舉人爲濱安令升嘉興通判未行以伉直忤都憲卿改知興國縣事值辛酉兵燹後十室九空瑞勞來安集漸復舊業縣故瘠薄苦浮糧瑞述八事上當道次第請行懸賞捕盜捐俸修學又植松以護水口樹杉以興民利飲冰茹檗一如在濱安云安志

謹案明史海瑞傳謫湖廣興國州判官非江西興國知縣謝志據海忠介集贛州府志據梁雲龍所撰行狀

以瑞官江西之據與史傳所述不同傳間異詞沿習既久仍依其舊

龔有成南直隸嘉定人舉人嘉靖四十二年自詔安令調知龍南縣事值寇盜之餘瘡痍未復有成愛養招徠踰年境內稱治巡撫吳百朋奏爲本府同知仍管縣事

高砂下厯之役有成協贊有功轉蜀府長史

贛州府志

黃辰字文斷廣東大埔人嘉靖三十五年進士四十四年由戶部郎出知贛州府察姦摘隱吏民畏服治門火夫雜役修復書院議建定南縣治厯遷福建副使

贛州府志

府志

陳瀾浙江麗水人舉人嘉靖四十五年知信豐縣事下厯之役督府移鎮信豐兵將四集取辦倉卒瀾一身任之上無廢事下不損民地方恃以無恐暨新立定南縣督撫疏薦之詔加五品服俸調任卒於官

贛州府志

蔡汝蘭字子芳南直隸廣德州人初入國子監棄儒從戎積功升萬安守備時閩廣盜賊蜂起每有征討汝蘭常爲軍鋒之冠超遷南贛叅將巡撫吳百朋謀勦三巢

調諸營將卒令汝蘭總統之以嘉靖四十五年六月進攻下厯連拔諸要隘焚其積儲賊走田螺湖口追擊敗之賊所據寨嶺悉爲官軍攻破賊首賴清規夜遁苦竹嶂爲偵者所得自到死是役也論功汝蘭赫然稱最

據贛州

志補
州府

劉格廣東番禺人舉人隆慶三年知信豐縣事省訟輕徭勤恤民隱會雩都以丈田激變巡撫殷從儉三遣官往不能定格繼往片言解散執其首惡置諸法從儉疏其能留雩都信豐民請還益力未幾從儉去代者受譖言徙格荆王府審理正卒祀名宦

據贛州
府志補

葉夢熊字男兆廣東歸善人嘉靖四十一年進士萬曆二年由南戶部郎中遷知贛州府黃鄉故盜藪也界惠

州汀州贛州三郡其渠葉楷仍世爲盜屢撫屢叛夢熊佐巡撫江一麟以計平之遂卽其地立爲長甯縣以夏

歸累官甘肅巡撫遷兵部尚書

贛州府志

沈文淵字上甫南直隸丹徒人舉人萬曆四年知長甯縣事縣當新造城墉廨署學校壇壝文淵皆經始營之已而定里均糧團兵戍守諸事亦漸有條理考滿去任卒於途

長甯縣志

徐應奎字見吾

贛州府志
作字汝祥

一字剡溪浙江鄞縣人隆慶

二年進士萬曆八年任贛州知府持身清約故事鄉民以米薪入城貿易者必科其稅爲郡守交際需應奎悉除之馭下嚴明折獄片言兩造輸服上官苛取不經應奎力請裁省至觸迕不恤府治災竭力經營堂構一新

民不知擾其他興學課農惠政甚著累升福建右布政

使

據贛州府志補

劉世懋浙江青田人貢生萬曆八年知定南縣事猴嶺賊鮑時秀作亂將犯大石世懋練機勇設總領扼險據守示以兵威賊懼不敢入境民藉以安

據贛州府志補

劉昌祚南直隸武進人貢生萬曆九年知雩都縣事操履清白邑俗溺風水之說有停喪數十年不舉者諭之畢葬翦除上吉鄉刺盜高魁一等四境晏然升金華府

通判

贛州府志

崔允升字吉山海門人舉人萬曆十一年知會昌縣事下車卽革冗役恤里甲凡不便於民者悉除之纂修邑志文詞典贍卒於官

會昌縣志

祁汝東浙江山陰人舉人萬曆十二年爲贛州府同知
聽斷公明用法平恕獄難鞠者當道悉以屬之又以屯
田高下分等則以定運軍年限衛所至今利賴之終兩
淮鹽運使

贛州府志

黃克纘字紹夫福建晉江人萬曆八年進士十七年知
贛州府事歲大侵發倉以振更因舊學之製而新之鳩
工庀材召饑民赴役給以廩中餘粟皆競赴不期月訖
工升四川提學

贛州府志

冒夢齡字汝九南直隸如皋人選拔貢生萬曆十九年
知會昌縣事萬山窮僻吏治墮窳夢齡立意振刷之重
懲誣告窮究峻訟者加之罪造橫江橋以濟民新學宮
以課士踰年升慶遠府同知

江南通志 贛州府志

葉夢熊廣東仁化人舉人萬曆二十九年知定南縣事三十二年歲饑請發大濟倉備振時大盜丁天勝據險

出沒夢熊密開員魚逕率鄉兵千人出勦擒之民乃安

據贛州府志補

陸化湻字君復南直隸常熟人萬曆二十年進士三十四年任贛州知府法嚴政舉兩橋稅入別駕某請同視權衡化湻固辭因以羨金四千儲府庫年餘化湻病革別駕往省微諷之則伏枕謝曰吾無事此家人復請以手麾之出遂暝贛州府志

嚴遵試字行之廣西賀縣人舉人萬曆閒爲贛州府同知鞫獄推見至隱常與輕比不深入盜賊竊發禽制有方往往得其交通主名按捕之無脫者攝府事吏胥屏

息無敢出一語受賊銖兩皆知之東南瀕河居民苦板木牙行則爲蠲其役在任四年歌謡盈路

贛州府志

李熠字鄰郁河南涉縣人萬曆三十五年通判贛州職榷稅凡僨夫摻卒一切罷去貨舶至關下令賈人自相估佔不以實者罪之禁胥役躁踐過者皆感激以欺隱相戒考滿加五品服因任越六年升德安府同知其後有南陽李若素者判郡筦榷政亦以恤商施惠聞人稱

二李

贛州府志

阮悉廣西懷集人舉人萬曆三十八年知雩都縣事性敏決察奸摘隱吏民皆畏服邑賦役不均數十年民受其累悉清除之又捐置學田資諸生膏火去官日民建

祠以祀

雩都縣志

次宗周字熙偉福建南安人舉人萬曆三十八年知興國縣事澈濺二水自城北合流過縣南舊爲浮橋以濟歲久圯毀議易以石未就宗周至始捐俸訖工徵輸有法買田數十畝資軍黃二冊解費又設白沙渡使民不病涉徙官後縣人爲長春臺志去思焉微水林

蔡鍾有字恆卿福建同安人舉人萬曆四十四年知興國縣事嫻於吏職能得物情邑中僑戶多桀黠喜訟不得逞則更託他籍或一人而二三籍者鍾有請於上僚痛釐治之俗乃革邑屯田久蕪府檄召民墾荒給帖爲業已墾者軍復爭之前令何應彪盛陳刁軍害民狀巡撫李汝華深然之未久復爭郡守金汝嘉頗庇軍鍾有一條陳源委言多切中汝嘉不能奪輯縣志爲類十有三

手自編纂迄今文獻不墜者鍾有之力也

贛州府志

金文光字朴只南直隸石埭人萬曆三十一年武進士官福建遊擊勦倭有功升南贛叅將會屬境土寇踞九蓮洞爲害流毒及於閩廣文光以兵深入勦平之贛縣人爲立生祠

據贛州府志補

申用嘉字美中南直隸吳縣人舉人泰昌元年任贛州府推官臺使者委以疑獄平反者甚眾陳昌文兄弟相訟各誣弑逆罪紳士某庇其弟言於用嘉將枉法以坐其兄用嘉不從召昌文等至以天性感動之皆大哭復爲兄弟如初黔蜀用師檄徵贛州兵饑缺兵眾聚譁巡撫倉卒無所措用嘉慷慨出諭眾皆憤服考最當內擢巡撫以軍譁內愧抑之遷高州郡丞歷官至廣西右參

政據贛州府志補

沈振龍字潛起浙江秀水人萬曆四十一年進士天啓二年知贛州府事下車首嚴保甲之法閩寇發巡撫議徵兵焚郭外民居閉城堅守振龍不可曰吾有備矣就所立里甲勒以部伍張旗幟申斥堠寇聞不敢至嶺南北避難者虜集軍士輒縛上幕府指爲寇振龍按其妄多釋之竟以此迂上僚意罷官贛州府志

鄭楚勲字全初福建莆田人崇禎七年知雩都縣事性彊直苟利於民毅然爲之雖拂上官意弗顧也在官九年遷復學宮勸諭積穀增城墉備器械練鄉勇小大之政畢舉乙丙之亂賴以獲安分巡僉事原作副使陳士奇稱爲能吏第一以卓異考選雲南道御史據贛州府志補

王六如字凡夫湖廣黃岡人舉人崇禎七年知信豐縣事時寇盜蜂起兵役數發舊舉富戶當之輪役經年無不破產者六如請於上官按糧編派黠者不得規避立碑著令邑人深德焉

贛州府志

陳履忠字公亮一字鳳阿雲南昆明人崇禎十年進士十一年知贛縣事有幹濟才建社倉以備歉廉泉之側舊爲養濟院履忠創爲書院以興文教鼎革後臺榭傾圮獨書院不廢

贛州府志

金廷韶進士題名碑作金廷詔字二如浙江山陰人崇禎十六年進士福王時授贛縣知縣巡撫李永茂貪懦失眾心兵大噪永茂不知所爲廷韶單騎出召耆老慰諭罷去已而楊廷麟督師於贛廷韶豫儲備申約束且策張安必

江邑縣志卷三十三 贛州府 三
賈事張安者粵東降盜唐王授副總兵稱龍武新營者

也其後安果爲民害反兵攻城廷韶率民登陴力戰親

禦矢石二十餘日乃解尋擢吏部主事去 大兵定贛

州後廷韶麻冠布袍臥山中後爲頭陀披髮策杖往來

海濱二十餘年而卒

王源居業堂文集 季遺臣介節甚著舊志敘述未詳

譖案廷韶明

貞揚闢以
爰改撰以

程必進字景雲浙江松陽人拔貢生除贛州訓導城陷

冠帶南向拜赴水死子矩泣曰父死忠子豈可不死孝

次日亦死

據浙江通志補

林逢春唐王時爲贛縣令丙戌十月四日 大兵自南

門入逢春死之乾隆四十一年

賜謚烈愍

據贛州府志補

國朝

曹廷偉

贛州府志作曹邦偉

字文雄山西陵川人

府志作沁水人

恩貢生

順治四年任定南知縣金聲桓兵至殫力捍禦不屈以死子翰明次子諸生際盛從子翊明僕曹伏新等十一人皆遇害聞者爲之流涕賊平贈按察司僉事予祭葬

蔭一子入監

山西通志

呂應夏山東掖縣人選貢生順治四年知龍南縣事五年五月金聲桓寇贛州閩廣響應定南知縣張於衡從賊詣應夏給取縣印迫令投賊單應夏自刎幾絕於衡驚走七月寇圍城九月城陷應夏被執不屈死之

贛州府志

蘇峻大順天人貢生任贛州府推官順治五年雩都賊曾斌羅聚奎等嘯聚禾豐山謀以二月窺城巡撫劉武

元發兵勦之，僨者謁傳城中士民與賊通，諸將議先屠城而後擊。賊峻大時以他事過雩都，雩都民焚香城上，以自憇。峻大疾，驅至郡見武元，力言之，乃遣飛騎止諸將持讐眾所用二金卮爲信，遂移兵獨勦禾豐。先是，居城之介，以某夜夜分破三發爲約。城中人皆擊豕祀先，聚食醉飽，以待侈破。已二發，哭聲殷地，及飛騎至，得全，皆慶更生焉。雩都縣志

李若娘字電之，順天宛平人。初爲南贛巡撫軍門守備，順治六年巡撫劉武元檄使攝興國縣事。令叅將原作副將鮑虎率兵二千人與偕合擊賊宋朝宗於金斗山，破平之。虎振旅還郡，若娘乃行保甲法，計戶多寡募鄉兵，躬自討練，會叛寇王大勇來攻，若娘勦擊，大勝，生獲數

百人邑民始奠暇則延接儒生問民疾苦興革皆合時

宜翕然稱賢父母

贛州府志

吉允迪字太邱陝西洋縣人順治六年進士七年知信
豐縣事時議勦安遠砂舍賊練鄉兵於新田賊聞令已
離縣謀從他道襲城允迪偵知之夜伏兵於龍頭逕賊
至大敗之九年復奉檄勦黃石砦副將楊栗賈三榮久
戰無功允迪與賊書諭以威德賊乃聽命允迪趨勇絕
人嫻兵略數以討賊自效所至克捷

信豐縣志

趙夢仁字卜生河南新鄉人順治六年進士八年知興
國縣事縣經兵燹之後絃誦不聞夢仁振興文教諸生
匿不就試者召至庭與之講論由是士稍知嚮學又募
民墾闢荒田瘡痍漸起不二載以憂去

徽水志林

蔡國相浙江仁和人順治八年攝定南典史九年十月十五日廣賊數萬人乘夜突至國相率鄉兵力戰殺賊數十眾寡不敵爲所擒猶徒手搏賊而死

贛州府志

祝天壽遼東人貢生順治九年知定南縣事先是劇寇陳鳳李時戴等屢躡縣境前令曹廷偉

原作邦贛典史蔡國

相先後以身殉天壽繼任躬率義勇挫賊鋒東捍西禦日不暇給十年正月大敗賊於龐石別賊伺官軍出乘閒奪城天壽妻死焉天壽聞之還師擊城賊破之賊潰遁城以復完乃詳請橫岡營員駐城中以資防禦次第興復諸廢墜保障之功屹然

贛州府志

郎永清字定庵漢軍鑲黃旗人以大臣子弟選就國學順治十年擢知贛州府事贛州自丙戌城破復以閩廣

連歲用兵民多轉徙永清勤招徠嚴約束復業者日衆
大兵之討李定國郝尙九也道贛州餉馬以行永清
預度城南演武場地爲營柵芻糧畢備而自往萬安迎
哈朱二帥陳說郡當新定不宜騷動之故帥感其言下
令止兵士入城瑞金石城被寇害最劇永清爲民營室
廬瘞齒骼興國瑞金定南三邑洩饑發大濟倉粟往振
之全活無算贛州諸生王曰旦爲盜所引不勝刑誣服
永清廉其枉出之又雪興國縣民廖安民之獄在官四
年以兄子廷佐巡撫江西當引嫌去贛民伏虔臺乞留
候代又一年乃行民爲之立祠以祀贛州府志

黃之麟字瑞白江南宿松人貢生順治十年授興國知
縣縣界閩粵久爲賊踞之麟招賊王大勇降滅賊孫可

貴勦平梅窖峒賊曾拱宸等墾田糧二千八百石有奇
士民爲十頌志焉

江南通志

黃里字君畝湖北人貢生順治十二年知贛縣事請免
荒糧一萬三千缺丁八千七百留給鎮兵抵漕運其後
巡撫卒采里議上

聞至今兵民食其德

贛州府志

沈元箕字子弓江南吳縣人恩貢生順治十二年知長
寧縣事先是閩人朱家垣託歸順名居長寧結土豪分
立十營閭井有事必關白而後行視令尹若贊旒然爲
害者十年元箕至具以其狀告巡撫蘇宏祖宏祖乃召
諸營爲首者界以銜分隸他營以次解散所奪民產盡
給主者大害以除

贛州府志

李佑之字在公山東長山人選貢生順治十四年知雩都縣事粵賊范日星嘯聚東鄉佑之用所撫之眾擒之六年秋海寇蠢動江左降賊李玉廷復叛大府遣將攻圍賊壘佑之親厯行間密布閒諜於是賊驍將張甯閻勝等先後投誠玉廷宵遁獲之於九山田舍

贛州府志

王枚字卜子浙江慈谿人

原作鄧人誤

順治十五年進士康熙元年知贛縣事時浙承平流遺復業荒蕪稍稍成熟

有議升科者枚喟然曰藏富於民古之道也吾不能如惺軼之所爲議遂寢枚自爲諸生時卽有文名至是遂興文學尤工書體勢雄勁嘗縷竹絲爲筆以書號四明

書格

贛州府志

孔興訓字覺所山東曲阜人康熙三年任贛州知府以

嚴肅爲治慘姦剔蠹胥徒畏之若神歲己酉閩海降兵屯田於贛州諸屬在興國者尤桀驁洶洶欲爲亂興訓親往履謹畝尺寸審度俾兵民各有其土在官九年治績稱最

贛州府志

王璋字豐年浙江人康熙五年知興國縣事時縣廝燬於兵璋構材修建政事多所興革八年部議閩海降卒屯田贛州諸邑璋恐聚處生變且病民請於知府按籍授田析置諸鄉以散其勢不法者按律繩之皆斂戢不敢動後以鹽政墨誤去

贛州府志

井庶字素庵順天文安人順治十八年進士康熙七年知長甯縣事時總督董衛國檄各縣運倉穀至省協濟厥詳陳轉般利害得免解費白金一千八百兩有奇士

一年閩寇入境厥調選鄉勇屬典史鄭之鵬會勦大敗

賊於牛門山

長甯縣志

張澈字渭有湖北黃梅人副貢生康熙七年知雩都縣事政務簡靜十三年閩變其部因屯墾居興國者嚮應助亂據厓石山鈔劫尋擁眾叩城下時城中無兵澈乃多張旗幟以疑之賊驚去明年升雲南雲龍知州贛州府志錢志泗浙江山陰人康熙十一年任興國典史甲寅之變屯弁石昭最先發六月巡撫遣兵勦之志泗餽餉行至江背峒寇自後襲之遂遇害事

閩庶

一子經歷

激水志林

郭毓秀字鍾山陝西人舉人康熙十二年知贛縣事爲人悃愞無華十三年耿精忠孫延齡叛於閩粵官兵出

入多道贛有蠻語謂玉田邨民通逆主兵者謀殲之毓秀言於巡撫佟國正總兵哲爾肯曰自兵寇交証四境蕭索獨玉田邨驚溪二二邨氓能自保聚遂以蕃庶遠以大逆誣之恐非惠養元元意也巡撫總兵皆然之毓秀卽馳入玉田邨令毀其壘而令供芻糗倍他所議遂

得寢

贛州府志

劉治國順天良鄉人廡生康熙十三年知信豐縣事十五年六月賊王割耳等率眾萬餘攻城治國將家子有膽略增修城濠督兵守禦數月援兵至得解城遂全

信豐縣志

黃惟桂字木庵直隸真定人舉人康熙十五年知興國縣事時漢賊韓大任據吉安邑中罹寇已四載惟桂招

縣志

懷攜貳謹扞拔豫儲待不遑寢食其年冬大任戰敗竄
甯都萬安瑞金閒皆假道興國惟桂率民兵登陴戒嚴
賊去則官兵之躡賊者至惟桂備牲醴犒賚得其懼心
悍民之盤踞諸寨者亦相次解散乃上勦撫機宜先撫
寶石次浪川又次鯉公諸寨皆降獨厓石寨朱明狡惡
負固乃陳狀於宣義將軍尙之義重兵困之四閱月始
自縛下山撫局乃定值山水暴漲齧城繼以旱災發食
振餉祈霖禱疫備嘗艱瘁二十三年春升貴州永寧知

州

徽水志林

李允楓陝西韓城人康熙三年進士十九年知會昌縣
事時田地荒蕪民賦逋欠允楓爲申請蠲免去官日貧
無歸資士民醵贈皆不受

陝西通志
李楓據進士題名碑改正

謹案謝志作

楊允和字育庵遼東人康熙三十二年知安遠縣事歲饑捐俸振施存活以萬計邑俗溺堪輿好以父母枯骸屢更葬地名曰檢金允和力申禁且著木鐸餘音一書刊布之俗始革邑多山田有桔槔所不能施者允和製龍骨小車以戽水灌漑農民至今沿其法

贛州府志

盧振先字孝則奉天錦縣人貢生康熙四十年知雩都縣事甫至官閩人吳臨美嘯聚大田鄉居民震動振先單騎諭之遂散五十二年值蠲賦奸民有藉詞煽惑謀不軌者上官初議用兵振先請除首惡貸其餘人其事遂定在官十數年築隄障水勸民舉殖皆能以仁心爲

政升泗陽知州

贛州府志

朱光園字西山安徽休寧人貢生康熙四十三年由刑

部郎中出知贛州府以化民成俗爲先不尚苛細繕城隍實倉廩新學課士士民懷之祀濂溪書院

贛州府志

張尚瑗字宏遠一字損持江南吳江人康熙二十七年進士改翰林院庶吉士散館以知縣用四十三年知興國縣事值歲侵發常平倉穀以濟穀盡則勸富民出粟賚廩以拯飢者凡全活數千人修城建樓及諸壇廟之葺皆半出己資爲之旱工文章記誦淵博所撰激水志

林澈江古蹟記諸書詞義典雅尤足備一方之掌故云

贛州府志

汪士琇字琪石江南黟縣人舉浙江鄉試康熙四十八年知長甯縣事五十一年權知會昌下車卽痛懲豪猾吏且召諭之曰若曹稔惡不可勝誅今去其太甚者姑

賈汝莫玩吾法諸吏皆惶恐相戒勿犯民心大懼

贛州府志

黃鶴字松安雲南廣通人舉人康熙五十二年知會昌

縣事雩都禾豐民倡亂劫掠與水頭奸民合犯縣境鶴
調兵守禦單騎疾入其鄉先獲渠首眾遂解散調署長
甯禁革雜稅三十六事以病歸襄無長物

贛州府志

鄭昌齡浙江蘭谿人舉人初知甯都縣乾隆三年調知

會昌縣事甫四月清塵牘三百餘事明年代者至昌齡
謂之曰會昌俗謹愿得其情固易治也訟訴蔓延皆我
輩因循所致令不自咎而謂民之難治可乎既去民立
去思碑志之後升撫州知府

贛州府志

葉新字惟一浙江金華人舉人初授江西建昌知府政
務簡靜嘗辨南豐疑獄爭之大府得生者二百餘人乾

隆十八年調知贛州府以次興除利弊案牘爲之一空
先是上猶山民有倡亂者聚眾巖谷閒逆迹漸著其地
與郡密邇民震恐新多方撫循躬至上猶佐大府捕獲
諸逆黨其事遂平旋緣事罷職去之日父老皆嘆惜泣

下贛州府志

鄧蔚林字暢亭陝西三原人明通榜進士乾隆二十三
年知興國縣事禁淫祀抑豪強杜干謁戢胥吏聽訟是
非立判事關名節必委曲保全之二十七年三十年再
充鄉試同考官所取多貧士知名者升九江府同知贛州

府志

諾爾布蒙古鑲白旗人乾隆三十二年任橫岡營都司
約束嚴明兵民不擾三十四年粵匪入境肆掠諾爾布

分兵巡緝身先士卒晝夜不輟者彌月四境得安士民交頌之

贛州府志

門錡字子湘漢軍正紅旗人乾隆二十二年進士三十四年知長甯縣事潔己愛民獄無大小皆力剖速結而馭胥役治盜賊尤嚴三十七年以才能調知贛縣奸民楊某造逆劄列長甯人姓名投之縣縣以聞諸上官將以兵討錡在贛聞之曰長甯民安得有是是必僞也乃具結保長甯民不反旣而偵事者至劄果僞乃逮楊某杖殺之合邑晏然

贛州府志

葉廷珩廣東新會人舉人嘉慶二十四年攝會昌縣事崇尚節儉減僕從杜私謁嚴懲衙蠹命案誣訐者禁之不妄繫一人有以匿契漏稅告者卽於堂皇令印契投

稅而去

贛州府志

王維屏字菊谿山西猗氏人嘉慶元年進士道光二年

知贛縣事天地會者倡自閩粵奸民黨羽蔓數省贛與

嶺南接壤習俗强悍不逞者尤而效之私立洪二和尚

木主煽惑愚民糾眾肆掠維屏至捕獲蔡三三等嚴置

之法餘黨解散六年大饑發粟振給尤能有所濟於民

贛州府志

謹案天地會府志縣志俱作添弟會伏查

檔案乾隆五十一年臺灣林爽文之亂始由天地會起

學其說以三指按心大指爲天小指爲地意極悖逆地

方官規避處分改作添弟二字化大爲小奉旨

將改字之幕友治罪今恭依

聖訓書作天地會字

李光里字東亭順天寶坻人嘉慶十四年進士

贛州府志作李

光先寶坻舉人誤

道光三年任贛州知府龍南安遠二縣多衙

蠹把持官府民深受其害光里選幹員擒之鞠實斃之

獄一方獲安疏惶恐灘往來者尤便焉

張維屏總
松廬文鈔

王友沂字春泉江蘇溧陽人廩貢生道光七年任贛州府通判布衣疏食蕭然如寒素十年攝信豐縣事俗好械鬪相仇殺至累十餘年不休友沂至悉斷決之懲勸互用迄今王李袁賴諸族修好如初烏漾灘石勢險惡中流僅容一舟觸石輒壞友沂集役疏鑿旁濱小河一曰鳳巢灣以濟行舟往來者稱便逾年去官卒於道

贛州府志

劉雨田貴州人道光中官興國縣典史工技擊視盜如仇縣獲盜刑或少寬必稟請自治曰吾捕官責也剝盜劉仔兒者性凶悍人莫敢近雨田夜率健役往圍其居盜揮刀相格雨田手鋗折其臂縛以歸境內肅然

贛州府志

汪云任字孟棠安徽盱眙人嘉慶二十二年進士道光十年知贛州府事懲奸剔蠹綱紀肅然嘗倡建府鹽商民義倉購造倉廩數十所積穀三萬餘石十四年大饑城中民賴以濟試院火勸諭重修規模宏敞麗澤山齋及廉飲堂夜話亭之建興廢舉墜士民尤詠歌之尋以憂去

贛州府志

武穆醇字敬斯一字小谷河南偃師人父億官山東博山知縣爲乾隆朝經師循吏穆醇善承其學以副榜貢生中嘉慶十二年舉人二十二年大挑一等發江西以知縣試用累擢吉水龍泉樂平萬載贛五縣一充鄉試同考官補永新知縣調補信豐所至以聽訟爲先務廉平威惠吏民畏且服信豐匪徒黃德標糾眾肆掠占粵

民周承福妻爲妾承福死焉穆醇盡捕其黨置之法又
購擒盜首袁勾鼻孜等境內肅然道光十一年邑大饑
明年亦如之穆醇治荒政如法民災而不困卒於官邑
人爲建武公祠以祀

謹案穆醇官江西十餘年以治獄著稱時有神君之號所決事詳其子未所撰行狀及散見他府縣志中茲不具錄

潘安國字雲槎雲南蒙化人舉人道光三十年任興國
知縣政教修舉咸豐三年粵賊撲城勢張甚安國與邑
人韓進春等共議戰守賦絕命詞示必死會鄉兵大集
進春縋城出擊大破之五年賊復來攻安國令鄉勇與
官軍合擊擒斬無算賊大潰自是鄰寇不敢復入境累
升九江知府未至任卒

贛州府志

楊豫成字澤堂山西陵川人道光中由舉人大挑分江

西以知縣用歷知安義龍南贛甯都諸州縣事皆有循聲咸豐五年署贛州知府明年粵賊自吉安上竄圍攻郡城豫成督兵勇駐城西門樓誓以死守閱十月未一還署事平加道銜以知府用

賞孔雀翎在官六年日以戰守爲事勞心焦思士民咸戴其德

調知南安府未上卒於郡

贛州府志

楊毓藻山西榆次人任雩都知縣咸豐七年粵賊分擾贛州諸縣毓藻登城固守城陷遂與前知縣顧友仁先後巷戰死典史許恩培陣亡於西門外友仁大興人事聞毓藻建專祠友仁等附祀

江
西忠義
縣志

周士焯字端甫浙江桐鄉人諸生咸豐八年任信豐縣楊溪司巡檢粵賊圍城四境驚擾士焯率鄉民嚴守隘

口自冬徂春無少懈同治三年秋八月賊自南雄州竄入土坯迎戰眾寡不敵死之家屬從死者五人大吏以

罵賊殉節入告

恩卹如例

贛州府志

業普崇額字湯臣滿洲正紅旗人咸豐九年任羊角營都司時粵賊攻據鄰邑勢將犯境業普崇額嚴堵要隘與士卒同勞苦七晝夜賊始竄去十年冬賊眾大至業普崇額身先搏戰手刃數十賊力盡死之

贛州府志

汪寶樹字仲之江蘇儀徵人同治六年署定南廳同知事剛明果斷尤嚴於治盜政聲甚著父病躬侍湯藥卒不起斂畢從容仰藥以殉聞者莫不哀其志云

贛州府志

宦績錄十七

南昌直隸州

吳增南唐

增

王揆字孔度黃岡人太和六年令虔化築城濬池建立
廨舍創始之功居多

嘉靖林志

周章字仁績南唐時知虔化縣增葺子城爲防禦計

嘉靖

林志謹案舊志作知甯都縣攷南唐時甯都尚名虔化至宋南渡後始易名舊志不明治革遂有此誤今

正訂

宋

李寰字畿卿郴州桂陽人紹興二十六年知甯都縣事時梅江無梁水漲則病涉者寰作橋以濟民爭趨役將代猶夙夜董勑畢役而後行父老感其德構祠橋東祀之廬陵楊萬里爲之記

贛州府志都直隸州志甯

沈木秀州崇德人嘉定進士知石城縣事時汀寇入境

巡司誤指同姓者爲賊木察其非破械與約使捕真賊以自白已而果縛賊首熊子開以獻人服其明

贛州府志

都直隸州志

魏泌字深甫衢州常山人嘉定九年知南都縣事捐俸購田以贍學者而躬考課之於是登賢書者十有二人

人文遂大振

贛州府志

葉湜字子是建安人以父任得邵州新化簿改尉甯都刺賊數十人深入廣右爲虜已易服遁歸湜廉得之盡捕置之法後以宣義郎知贛縣督吏胥不少假借而以家人父子遇其士民兩造至庭一見卽決無所宿滯邑有田訟更數令不能辦枉直湜一見詰問具得其情縣

人稱神明焉

真西山集

陳霖泉州人嘉定中爲瑞金尉盜起江閩霖迎敵力戰
盜繫之以去不屈遇害

據一統志補

林光裔福州三山人嘉定十二年知甯都縣事縣俗多
溺女光裔儲米爲舉子倉積俸爲舉子錢貧民生女者
鄰里以聞先給錢五百米五斗以養其母閱月抱女至
庭驗視則月給米三斗至周歲而止行之數年全活者
甚眾

贛州府志 南寧都直隸州志

趙紳夫福州三山人紹定四年以贛尉攝甯都縣事時
石城寇黃元仲僭號狂逞紳夫亟葺城注濠爲守禦計
賊圍城登臺射之稍退率兵逐北遂擒元仲斬於市明
年還贛父老勒石紀其功端平二年升知縣事

贛州府志 南寧都直隸州志

劉弁字清叔汀州甯化人端平二年進士厯會昌尉知

瑞金縣事築城建學以平洞寇功改京秩終奉議郎

贛州

直隸州志

甯都

趙時僑福州三山人紳夫從子景定中知甯都事先是

下磜賊廖四猖獗勢將逼城時僑在道聞警單騎疾馳

至乃選義丁爲兵以禦賊勸富者出資以給兵兵食交足與賊戰大敗之斬其渠縱火焚賊砦殆盡

贛州府志
甯都直隸州志

直隸州志

元

達實蒙古人泰定中尹甯都莅官廉明政事修舉時盜賊所在嘯聚而境內獨恃以安達實念賦浮於額遂稽其實奏免虛糧五百餘石均平其庸調而後征輸者視

舊輕省民立碑頌其德至正中升本路達喇禱齊

原作達魯

花赤 贛州府志 謹案謝志據嘉靖林志誤作泰定中以贑州總管攝甯都事今從府志

明

莊濟翁福建永春人洪武四年知甯都縣事勸農興學雖閭巷小學生徒亦令朔望赴邑庠聽講遠近聞風而化懲豪猾修陂塘造梅川橋人懷其惠

明一統志

朱伯齡浙江金華人洪武閒任甯都縣主簿承寇盜剽掠之餘政多惠愛覈無田奏免租稅民甚感之

甯都直隸州志

周昂字時舉廣東曲江人舉人正統十一年知甯都縣事持廉秉公勸農興學十三年閩寇鄧茂七倡亂陷石城瑞金二縣昂豫爲之備伺寇至卽率勇壯與賊戰於東龍屢斬獲已敗之於上磜又敗之於白玉賊遁去論

功升本府通判

甯都直隸州志

阮衍交趾人正統閒知瑞金縣事流賊初平兵士驛騷者眾衍立法防制皆不敢犯撫瘡痍招流亡乃益布其

惠於民

甯都直隸州志

崔惠字迪吉福建晉江人舉人正統中任石城縣學教諭十三年叛寇陳椿入陷城惠被執罵不絕口行里許賊焚草營遂投火自焚死

福建通志

聞韶湖廣羅田人舉人成化二十一年知石城縣事才識通明防禦廣寇兵食以時足邑賴以安調武甯知縣

甯都直隸州志

平世用字德中

一作字德充

四川內江人宏治九年進士十

五年知甯都縣事葺城濬池興學校均庸調慎刑獄遏

甯都直隸州志

寇盜政績甚著以憂去後升監察御史累官至瀕滄兵

備副使

據甯都直隸州志四川通志補

萬琛字廷獻南直隸宣城人舉人性慷慨負氣節初選

清江令宏治十七年補瑞金知縣居數月粵賊乘元旦

夜攻城殺門卒突入縣人洶洶逃竄有勸琛急去者琛

斥之率民兵數十人迎敵殺賊二十餘人相持至明日

力屈被執罵不絕口賊攢刺之乃死贈光祿少卿賜祭

葬蔭一子

明史忠義傳
統志舊志

蔡夔廣西南甯衛人舉人宏治十八年知甯都縣事居

官清苦政令必信勾攝以木阜隸令訟者自抱至庭毋

敢後者清浮賦均隱沒之田豪右相戒莫犯驅斬巨寇

惠及鄰封以憂去正德七年起補安遠時何積玉將據

城以叛夔焦勞備禦密集忠義士畫計擒之餘黨解散

邑境以安

舊志
直隸州志

甯都

王天與字性之廣東興甯人正德九年進士知甯都縣事廉平有政績歲丙子從督府王守仁征橫水浰頭桶岡龍川諸寨有功升俸二級己卯從討宸濠冒暑疾作卒於官守仁哭之哀解衣爲斂明年錄平逆功優恤其

家邑人肖像以祀

豫章書

李夢周字希道南直隸海門人嘉靖二年進士三年知甯都縣事俗好鬼事五王廟歲市子女以代牲夢周火其廟及他諸淫祠皆毀之勢家某橫里中夢周治以法籍所奪田歸之民遂爲所中傷解綬歸及卒貧不能殯

陳大綸字伯言廣西南甯人嘉靖八年進士十一年知甯都縣事諮詢民閒利病亟爲興除賭博者痛繩以法創立社學命塾師教童子歌詩習禮時行賞賚風俗爲之一變

贛州府志
甯都直隸州志
甯

王武字公儀福建侯官人嘉靖十一年進士十七年以南戶部主事左遷瑞金令廉明強幹政教兼舉創鄉校聘名儒爲羣士師置田以供費文教聿興鄰寇竊發武多方備禦時出偏師以挫其鋒賊不敢犯遷東平知州

甯都直隸州志

趙勳字彝伯廣東番禺人舉人嘉靖二十年知瑞金縣事均平徭役興學校修邑志改建雲龍橋嘗委振龍南信豐存活甚眾安遠黃鄉賊葉金糾眾剽掠勲奉督撫

檄往諭單騎入賊巢推誠慰撫縛倡亂者以獻一方晏然擢授御史

甯都直隸州志

何右之廣東順德人舉人嘉靖二十八年知石城縣事
贛州府志作三十五年知縣事有幹才懲猾平冤清豁絕軍百餘名民世食其德

據甯都直隸州志補

潘翊浙江錢塘人舉人嘉靖二十九年

府志作三十七年

令甯都

都才識敏練優於治劇縣故無驛遞過客夫馬責之民閒翊至始立官船官馬不擾於民性尤廉正有榷罪者因吏餽金翊嚴拒置於法升沅州知州

贛州府志

甯都直隸州志

雷撻福建建安人嘉靖三十四年任石城典史時流寇攻圍縣城撻兩夜跣足巡邏厲眾堅守尋用計破賊賊

遁城獲全

贛州府志

甯都直隸州志

甯

呂若愚字可明浙江新昌人嘉靖四十四年進士隆慶三年知瑞金縣事至官廣書院規制闢宣文門增修公署橋梁祠宇煥然改觀時紅蓮白蓮邪教煽惑若愚捕其魁二三人置於法餘卽解散終駕部郎中

蘭州府志
蘭都直

志
蘭州

陳言字伯實浙江鄞縣人以鄉貢授官教諭萬曆六年升石城知縣下車先與諸父老誓曰吾若橫取石城一錢卽不能生還自後并所應入耗贖概郤之巡行鄉落不受民間一簞一笥俸餘以償貧士修繕學繕橋道諸廢畢舉有大猾交通亡命爲之囊橐言捕治之盜賊屏息在官四年一意與民休恩縣大治御史某按部索金言笑謝不應卽日解官歸民號泣追送爲立生祠

據石城縣志

李廷龍廣東順德人天啟二年進士四年知甯都縣事性廉潔不名一錢家鬻荔枝山以供官用官署所贏惟束帖數箱而已明季有司清德無玷者推廷龍爲最升吏部文選司主事

據贛州府志甯都直隸州志補

馬調鸞山西平順人崇禎四年以歲貢任石城知縣時流賊肆橫調鸞修城垣團練鄉勇多方守禦四境獲安升懷慶府通判民爲建祠立碑

山西通志

國朝

郭自修山西絳縣人順治初恩貢五年知安遠縣事調知石城六年流賊張士盛陷城自修罵賊死之

山西通志

錢江字珥信一字容山浙江嘉興人浙江通志作秀水人順治六年進士七年知瑞金縣事縣有劇盜曰陳其綸許勝可

僧超忠超忠聚僧兵千人據銅鉢山尤橫江先以計誘擒超忠復設方略破勝可於羅漢巖獲之進兵大柏山其綸復就擒盜盡滅江在官均平里役修雲龍橋政績多可紀而平賊功爲大行取兵部主事督學山東復以

得士稱

贛州府志直隸州志

清

郭堯京字平野陝西高陵人舉人順治十年

府志作崇熙四年

知石城縣事時邑經殘燬堯京一意興釐學宮祠宇城堞警鋪皆捐俸以爲之倡先是大盜陳其綸與東關盜黃允會踞紫未散鄰界羅漢巖劇寇治鄉肆掠堯京募鄉勇伏險堵截其綸潛遁俘掠男婦悉放還在任八年

升郴州知州

贛州府志
都直隸州志

甯

朱必達字其在湖北黃岡人順治十八年進士康熙八年任甯都知縣清泰懷德二鄉久罹寇民多流移必達請盡蠲逋賦以徠之得漸次開墾十三年滇賊韓大侵犯吉安縣民震恐必達倣王守仁保甲法簡義勇束以部伍經歲得勝兵千餘人汀州賊奄至縣境必達揮義勇橫擊之賊大敗解圍去

韓炎有懷堂集
甯都直隸州志

李德明字瑞毓湖南巴陵人任贛州府照磨康熙十三年六月石城陷於閩賊總兵劉進寶帥師復之德明迎大敵至軍巡撫委攝縣事石城近汀而遠贛汀久爲耿精忠所據德明增陴鑿隍爲備豫計城中無井汲者必於江每被圍軍常患渴乃堰江水入城浚池以蓄之僞

將軍陳益擁眾來攻一戰而馘十五年二月滇賊高某
陷吉安賊勢日熾僞將軍劉應麟以書誘降不聽囚其
使應麟怒引眾三萬圍城時外援不至德明率眾力拒
鄉兵畢佛者中礮將死語其伍曰李公矢忠報國吾死
無恨若等謹守毋爲賊乘言訖而絕德明哭斂之眾皆
感激奮呼請效死德明知人心可用乃出戰五戰皆捷
自是汀寇不敢復睨城視事三載禱雨輒應人稱曰李
霖其受代行也生祠祀之

贛州府志

萬蹶生字文若江南武進人副貢生康熙十三年知甯
都縣事初下車減徵稅耗羨一粟一薪之費不以取諸
民三藩變起汀吉之間皆賊黨所潛伏俗故好亂蹶生
踵前令宋必達鄉勇之制部署民兵而訓練之十六年

韓大任竄入縣境蹶生多方禦之賊相戒勿犯既而郡
兵與省會兵大集蹶生支應有方民得不病越明年以
事黜既解組猶居甯都累年無以自食士民羣資給焉

魏補文集

王維威陝西富平人爲石城典史康熙十三年閩賊來
攻維威視事甫三日與照磨李德明協志守禦晝夜登
陴二旬乃解十五年劉應麟以兵再至維威與戰破之
嘗巡城矢集臂弗爲動三載寇禍卒保危城勞績甚著

石城縣志

朱維高字含英四川閬中人舉人康熙二十二年知瑞
金縣事邑苦里役維高下車卽禁革私當之弊罷里長
不設立石縣門著爲永例民困大蘇持身廉決獄明斷

痛懲吏胥之奸民尤感其德

贛州府志
瑞金縣志

王旦字子復河南蘭陽人康熙十八年進士二十七年知石城縣事才質彊敏案無留牘初至官催荷告警旦召捕卒授以策旬日獲劇盜八人皆殮之城兩圯於木板築勞勦屹然完固以憂去

贛州府志
都直隸州志

甯

莊楠字培峯江蘇陽湖人舉人乾隆二十五年知瑞金縣事甫下車廉知九堡屠者稔惡狀微服往捕之置諸法境內肅然尤善弭盜未期月民家外戶可不扃犬亦無吠去口士民攀轅塞道如失怙恃焉

南都直隸州志
瑞金縣志

惲敬字子居江蘇陽湖人乾隆舉人初授浙江富陽令遷江西新喻以廉明果決著稱嘉慶十年調知瑞金縣操守清潔人不敢干以私或待以非禮亦弗受鋤奸民

憲蠹役遠近質成者隨至立判書牘尾輒數十行無不
帖服人咸以張用濟劉元明目之工文章善於持論尤
樂推獎寒士前後官瑞金十年與邑士子論詩課文久
而忘倦秩滿遷任卒坐事罷吏議頗領以終

甯都直隸州志 瑞

金縣志

劉丙字克齋安徽廣德州人嘉慶七年進士初爲上高
令六年有惠政擢知甯都直隸州事州有內外城外城
東南塹江爲趾恒爲洪水所侵易剝蝕丙令以灰和亂
石築之城基始固其修環玉陂也長夏單騎行烈日中
導流決淤皆親爲指畫且紀其溝涂逕曲以賈後人又
著飼蠶浴蠶說教民興繭絲之利民至今尤感其慈愛

云

甯都直隸州志

蔣方增字涤初江蘇武進人監生少有才名嘉慶二十一年知瑞金縣事重文學修禮教廉正自持屏絕關說治民崇大體不爲煩苛民安其政教訟牘爲希公暇彈琴賦詩與邑人士之端謹者論說文藝旁及風土人情藹然有儒吏風焉道光六年乞病歸宦橐蕭然時人皆服其高致

甯都直隸州志
瑞金縣志

張枚浙江安吉人道光十六年進士十七年署石城縣事清廉明決平冤獄懲猾胥嚴緝捕之法邑之劇盜翦除殆盡一時治行稱最

甯都直隸州志
石城縣志

鄭長昕字少萊江南人舉人道光二十二年署瑞金縣事下車徧詢土俗因地爲治每鞫獄誘之盡言不爲鉤距擊斷雖桀黠者皆感其誠信輒自輸情以故案無不

結解任後暫居城外民有爭猶踵門乞辨曲直長昕曰汝今自有官耳何爭爲其爲民所信從如此

甯都直隸州志